

Sumiiffinni aalajangersimasuni KNI A/S-ip pisiniarfiutai akilersinnaasumik ingerlasinnaasut pillugit Naalackersuisut nalunaarusioqqullugit peqquneqarnissaannik Inatsisartut aalajangiiffigisassaattut siunnersuut. Pisiniarfiit taakku nioqqutissanik pilersuinissamut pisortaniit kiffartuussinissamut isumaqatigiissuteqarnissamut pisussaaffeqarunnaassapput. UPA2025 nallertinnagu nalunaarusiaq agguanneqassaaq. (Inatsisartunut ilaasortaq, Aqqalu C Jerimiassen, Atassut)

Akissuteqaat

(Naalackersuisut Siulittaasuat)

Siullermeerinnineq

Aallarniutigalugu sumiiffinni KNI A/S-p pisiniarfii imminut akilersinnaasumik ingerlanneqarsinnaasut namminersortunngorsarnissaannut periarfissamut nassuiaammik suliaqarnissamik aalajangiiffigisassatut siunnersuummut saqqummiunneqartumut Naalackersuisut qujapput. Killiffimmik oqaloqatigiissuteqarneq naliliinerlu tamatigut peqqinnartuuvoq. Aalajangiiffigisassatut siunnersuut sammisap qulaajaaffiginissaanut pissutissaqartitsilluarpoq, aamma KNI A/S-p pisiniarfiisa sumiiffinni inuussutissarsiornermut tunngatillugu pitsaasunik inissisimaffiini namminersortunngorsarnerinut ingerlanneqarsin-naanerinut piumasarineqartut periarfissaasariaqarput.

Namminersorlutik oqartussani pigineqartut aktiaateqarluni ingerlatseqatigiiffinnut piginnittuunermet politikkip nutaaq pillugu 2023-mi Naalackersuisut politikikkut isumaqatigiissuteqarput, matumani ilanngullugu aqutsinissamut allagaq tamarmiusoq *”Naalackersuisut piginnittuunermet tunngatillugu aqutsinermut allagaataat 28. marts 2023-meersoq – Ingerlatseqatigiiffiit Namminersorlutik Oqartussanit pigineqartut”*, pingaarnertut immikkoortut ilaanni Ingerlatseqatigiiffiit atasariaqarnerat siunissaallu pineqarpoq. Immikkoortumi tassani Naalackersuisut ingerlatseqatigiiffiillu ataasiakkaat ingerlatseqatigiiffiup pingaarnertigut siunertaasa ingerlataasaluunniit ilai inuiaqatigiinnut naleqqukkunnaarpata, inuiaqatigiit ineriartornerannut suleqataasariaqarput, Naalackersuisut suliniutinut periarfissanik amerlanerusunik aallartitsinnaapput allanngortitsinermut pisariaqartumut qulakkeerisumik, soorlu sullissinissamut isumaqatigiissutinik unitsitsillutik naliliillutilluunniit.

Najugaqarfinni isorliunerusunilu nioqqutissanik aningaaserivinnillu pilersuineq pillugu KNI A/S-mik Naalackersuisut kiffartuussinissamik isumaqatigiissuteqarput, kiffartuussinermi tunniussat annertussusaat qanoq ittuunerilu aalajangersarneqarput, matumani ilanngullugit nioqqutissat aalajangersimasut piginnarnissaat, akit qaffasissusaat nalunaarusiortussaa-titaanerlu. KNI A/S-p pisiniarfii matullugit pitsaasumik sumiiffinni inuussutissarsiornermut tunngatillugu namminersortunngorsarneri iluaqutaalluarsinnaapput kisiannili aamma pitsaangitsumik kinguneqarsinnaallutik illoqarfimmiunut sullissinerup pilersuinerullu

sapinngisamik pitsaanerpaap qulakkeernissaanut tunngatillugu eqqarsaatigilluartariaqassaaq. Suliffeqarfiup aqqissuussaanerata allanngortitsisinnaanerup nunap ilaani tamani pilersuinerup isumannaatsup allanngorartuunngitsup tatigisassaasullu qulakkeernissaa pisariaqartumik pilersuisussaataanermit pisussaaffik sapinngisamik sunniuteqarfigissanngilaa. Tamanna tunngavigalugu Naalakkersuisut misissuineq annertusineqassasoq innersuussutigaa, taamaattumillu ataatsimut ingerlatsinermit, ineriartortitsinermit pilersuisussaataanermullu KNI A/S-mi pisiniarfiit namminersortunngorsarsinnaanerinit qanoq kinguneqarumaanersut, misissueqqissaarnermini isummerfiginninnerminilu ilanngutissallugit.

Taamaattumik Atassummit suliniutigineqartut Naalakkersuisut tapersersorpaat, KNI A/S-ip taassumalu pisiniarfiisa namminersortunngorsarnerinit suliamik ingerlatsisinnaanermit tunngatillugu nassuiaammik Naalakkersuisut suliaqassapput. Tamanna tunuliaqutaralugu aalajangiiffigisassatut siunnersuummi siunertamut Naalakkersuisut isumaqataasinnaapput, kisianni ineriartorneq ataatsimut eqqarsaatigalugu sukumiinerusumik annertunerusumillu itisilerinermit tunngatillugu misissueqqissaarnerup annertusineqarnissaa kissaatigalugu.

Aalajangiiffigisassatut siunnersuummut allannguutissatut imaattumik Naalakkersuisut siunnersuuteqarusupput:

”KNI A/S-ip tamakkiisumik ilaannakortumilluunniit namminersortunngorsarneratigut inuiaqatigiinnut aningaasaqarnikkullu sunniutissat pillugit Naalakkersuisut nalunaarusioqqullugit peqquneqarnissaannik Inatsisartutaa aalajangiiffigisassaattut siunnersuut. Nassuiaat UPA2025-mi agguanneqassaaq.

Taamatut oqaaseqarlunga aalajangiiffigisassatut siunnersuutip saqqummiunneqartup Inatsisartuni oqaluserineqarnissaa Naalakkersuisut qilanaaraat.